

四庫全書

集部

欽定四庫全書

江湖小集卷四十三

宋 陳起 編

高似孫疎寮小集

入餘杭縣

明發遵西陸驅車月流光佳山迎車來知是古餘杭危
樹露如雨平野日未陽支流瀟清源弱羽無高翔人家
叢灌下世載山水鄉扣門作午憩白飢羞文魴邂逅有
足歡離合非其常主人不予鄙予留亦徜徉

憩昌化民家

晚程息勞轍白日流西輝
水鳥得魚去耘夫荷鋤歸
川原杳阡綿林野雜依霏
一來扣竹館相邀入荆扉
重巖吐清溜澄陰有殘馘
曰予考此室十世相因依
左右桑果足歲日雞豚肥
豐猶未至裕歉亦無能
饑予聞良自愜欲謀北山
薇有田可同耕有蠶當共
衣車夫猝無情此志仍重違

答李才翁

素意杳難尋殘鑪屬晚陰花知西洛事鴈叫北人心
客共艱難盡詩隨老大深金陵書不到消息又沉沉

宋江都研

數寸清純玉不如入波陶髮冷蕭疎千金爛抵荆山鵲
一璞深剗渭水魚墨帶花香臨近澗泓沉燈影了殘書
從來端歎難優劣名下真成士不虛

答宇文文學

無能應俗苦皇皇詩不驚人筆事荒天下無山如飯顆

人間有水自滄浪左杯右蟹一舟足早韭晚菰三畝強
莫謂覺來亡可嗜逢人猶自覓花忙

燕文貴山水圖

道山堂上御府畫展卷猶能記老燕十日何由辨水石
千金乃可分江天楚湘兩岸風落木海嶽三秋鴈度川
大山小山俱好隱江南夢去曲肱眠

答武昌吳廣文

平生不識武昌樓官柳青青好在不庾亮笛吹黃鵠月

簡栖碑駁碧苔秋山橫赤壁含情斷水出瞿塘快意流
何處叫君同一醉並舟秦女擘箜篌

丹砂歌謝胡史君惠砂床

宜州丹砂產暘谷不比辰谿攢箭鏃素霓深抱赤城霞
斬猩半染于闐玉海日下照珊瑚紅化為姹女金芙蓉
一從擘華分禹璞猶有絳氣埋雲峯鑄鼎泥壇有消息
坐看光輝成五色淮南雞犬亦同升九轉真能生羽翼

琵琶引

人生聚散難為別，何況匆匆作胡越。
梅梢帶雪下昭陽，明朝便隔關山月。
長城不戰四夷平，臣妾一死鴻毛輕。
回憑漢使報天子，為妾奏此琵琶聲。
長安城中百萬戶，家家競學琵琶譜。
酸聲苦調少人知，食雪天山憶蘇武。
西風吹霜鴈飛飛，漢宮月照秋砧衣。
嫫姚已死甲兵老，公主公主何時歸。

銅雀硯歌

曹公夜譙凌雲臺，一言契濶含餘哀。
分香老伎各雲雨，

歌舞不盡埋蒿萊漠漠頽基鄴山下萬里煙塵無一瓦
井幹罇酒自平生烏鵲飛南播遺雅老農墾雨開荒寒
一礫千金苔未乾世人好奇不好近直比周簋仍商槃
老璞渾渾殊質魯得水猶能發妍媸更與人間作瓌古
月明夜盜西陵土

黃居中瀟湘圖歌

天暉而雨斷兮作蒼梧九疑之高秋風行而川怒兮洩
瀟湘洞庭之奔流樹不知名兮山抱複嶺沙不計程兮

水趨他洲波作止兮蛟舞蛟蟄雲晦明兮猿呼猿愁原
不可作兮蘭亦塵土賈傳歸漢兮鵬其何尤誰呼魚兮
北溟有酒誰鼓枻兮南津有舟懷斯人兮杳靄千里目
悵望兮吾其歸休

寄吳鈴幹

有偉千人傑能為萬里遊挂帆春背鴈問澤夜驚鷗道
路空留滯文章莫暗投九疑生雨遍三峽帶寒流采藥
青神觀題詩白帝樓乾坤供爛醉星斗照閒愁漢已歸

蕭相天難壽武侯詞人頭欲雪壯士泪如秋中下猶須
策西南風倚籌有錢書盡買滅鹵志終酬猿破高唐夢
龍馴灩澦舟行人定安穩夏近可歸不

騎鸞引贈句曲山吳道士

夜騎白鸞出琳闕三萬仙官鏘珮玦雲雷帖妥過剛風
左推日九右扶月一息瑤池翠水家阿母迎謁龍驅車
青娥彈絲玉妃酒折盡蟠桃紅玉花九天大人來問道
太極之前天不老丹霞一氣玉樞宮寶笈繩金容探討

井君沐浴波五色洞房光芒上奔日天上傳呼六丁直
星斗離離礙鸞翼

補遺

聚景園

翠華不向苑中來可是年年惜露臺水際春風寒漠漠
官梅却作野梅開

四聖觀

劉後村云極藻
繪追琢之功

水明一色抱神州雨壓輕塵不敢浮山北山南人喚酒

春前春後客凭樓射熊館暗花扶屐下鵲池深柳拂舟
白髮邦人能道舊君王曾奉上皇遊

以上二首見武林舊事

石楠

自隨野意了山行香浸楠花白水生借得風來帆便飽
隔溪新度一聲鶯

木

下簾深與意商量無酒何如此夜長一筋木絲仙有分

依然只作秘書香

梅

胡仔茗溪漁隱叢
話作陳師錫詩

舍南舍北雪猶存
山外斜陽不到門
一夜冷香清入夢
野梅千樹月明村

以上三首見全芳備祖

欽定四庫全書

江湖小集卷四十四

宋 陳起 編

教陶孫臞翁詩集

以入定大士太乙真人像送莞晦叔

真人與大士蘭菊而異芳坐卧得定力銅眼鐵脊梁是
中有佳趣山海俱茫茫或時現神妙塵蹟生怪光云何
得此本有僧吳下狂飲酒不計斗褚無一絲藏興來高
閉門落筆如追亡走送臞庵室洗心一鑪香盤陀旃林

潤枕籍玉井涼蒙頭帔古遮眼經論長不知幾陵谷
睡穩坐不僵君家定吉夢二士相迎將辟除寒具油靜
展垂中堂會當同一龕寒泉薦空觴夜窓搖茶煙駝褐
依繩床楊枝灑寥閭藜杖輝森芒與君六根靜讀書到
虞唐

寄福清趙山舅陳夢實

路歧引人不作長野梅官柳禪風光看山看水入詩眼
歲月不覺鬚眉蒼請從大人開肺腸身非石人忘故鄉

五年江湖枕書睡夢隨南雲落翁堂亦知行坐歌白頭
池南隱几浴鳬雙鰥孤肯復有羈旅石塘破寺魂悲涼
毛錐不補萬事裂存者各在天一方善和里第知幾易
遼東城郭空相望平生何用酷似舅政似嫗母顰施嬌
兒時拊頭祝文章祗今未入崔蔡行三年一書願見賞
骨肉滿縣愁難當屋頭荼蘼定過牆滿窓日色文書香
眼前欠甥頗念否我亦口挂蠨山旁煩將歸意作泉下
小待錦衣漫俗妝

送林伯農還鹿角山

今我不樂遊四方夙昔已具浮海航十年點化鷗心性
一生正坐虎文章海山未必盡佳處徃與蜚子收漁梁
夢中了了說吳楚山川如掌今羊腸讀書南隣索檳榔
原頭汙耶豚酒香何時攝衣上公堂蛤蜊含漿魚尾黃
客從南來勤寄將

洗竹簡諸公同賦

舍東修竹密如櫛一日洗淨清風來脫巾解帶坐寒碧

置觴露飲始此迴平林遠靄開圖畫西望羣山如過馬
詩翁意落帆影外孤村結廬對瀟灑百年奇事笑談成
向來無此蒼龍聲閑身一笑直錢萬剡粉剡青留姓名
用韻謝竹主人陳元仰

熱中襪襪令我汗日暮主人期不來陳郎損人不下榻
青山白雲喚得迴手開十畝蕭郎畫箇裏何妨繫吾馬
食單得涼清可啜毳褐分陰翠如洒搖金憂玉真天成
夢搖風前茶臼聲一川窈窕荷萬柄野翁得此甘辭名

竹間新闢一地可坐十客用前韻刻竹上

竹君得姓起何代渭川鼻祖茲雲來主人好事富千埒
日報平安知幾迴平生好山仍好畫意匠經營學盤馬
別裁斗地規摩園自汲清池行播灑一杯壽君三徑成
請君靜聽風來聲醉眠煮得石根爛以次平章身與名

謝葉司理徐知縣見貽之什

二公乞社

書生自是鑽簡蠹淨業還從竹背來新詩細字行茂密
驚蛇起草盤蛟迴是身政欠虎頭畫望山氣如還櫪馬

脩然君子六千人不受湘靈清淚灑竹林定交業已成
北窓讀書吾伊聲金魚玉帶不汝却社中未厭山王名

一日復一日

一日復一日來如赴海波今晨我無糧未卜晡夕過辛
苦幸一飽知復有明何平生實愚闇慮淺憂則多雀鼠
偷太倉田野蜚螟蛾至尊尚盱食邊防望投戈我欲瀝
血訴官府多譴呵進退羝觸藩屈鬱鵬在羅壯心一不
遂六龍奄蹉跎所以憂世人散髮歸巖阿長生儻可學

吾其駐義娥

放船

柳邊放船試南風揚溪荷花能艷紅一川雲錦步不盡
我舟正在繁香中午天無雲青脈脈枕艫哀歌醉脫幘
更將綠葉穿碧筒欲臣屈卮奴太白風前一笑玉塵橫
蜻蜓側翅潛魚驚騎馬貴人多內熱此歡勿語長安城
須臾客醉船亦醉信流一抹西村外翁媪負牆樵牧奔
拾薪供茶初不記還家鼻息撼四鄰聞風接夢疑非真

清遊何時記三人
懼庵與弟拙鄉陳

次韻謝李秘校

常州無錫詩人

大雅熄自鄩續絃久無人
中間翰墨場名字俱已堙
江山亦何助東海真揚塵
我笑李夫子餅無半合陳
人書兩俱亡何用語逼真
作詩來起予欲卜二仲鄰
依然送鴻目袞袞天機新
莫欺鬢眉蒼持護應有神
狗鬚候舞陽羝角相平津
皇天信平分萬事各得春
但願閱世心孤特凜箭筠
日者鶴飛書江漢起隱淪
三物論鄉國六

藝程成均秋風入帝閑錯落駢駢君曾讀詔否却枕
方欠伸勿驚作詩面酒顙吹微鱗唾手洗哀陋一返姚
如純稽古不無力政復昌其身它時玉堂夢與問三生
因盟我良不難欲託孫子親贄君以黃耳附書莫辭頻
再拜賦斷章水石俱磷磷

此韻字義見詩
晉楊之水箋

次韻馮孔武雪中簡聞人簿乞炭

君不見朱門煌煌多近臣豹胎煮麋螯為薪庭中盛設
潑寒戲炙手欲近還嗔人誰知曝背茆簷下欲獻要是

山林真兒童抑搔皮肉輒日輪過中方欠伸懸鶉結駟
兩相笑百年俱成一窖塵先生自是冷官樣要看入火
紅麒麟撚鬚自作詠雪句秘思蚤與相如親蒲團擁裘
結僧坐別有締綌君南鄰願迴六龍照后土施與萬國
無邊春屑瓊鏤玉入肺腑拍手一笑未吾貧

乞炭於馮孔武再用前韻

君不見元光河決愁從臣天子有詔皆負薪當時實炭
知幾畚下與魚鼈爭生人孰知木黔善制水火出木盡

全其真一朝入火縱粉骨曲身得煖龍蛇伸成虧等作
萬世計肯與胡僧推劫塵我欲訴諧與作傳上繼毛穎
追獲麟日燒崑崙十挺指惜哉黔也非我親窮朝破竈
鬱煙燼青唇黑腕羞比鄰誰能與致送煖熱坐使有脚
歌陽春將軍煮酒空作夢十年未有今年貧

思古人

思古人思古人古人皦皦若日月我欲剖棺斲出古人
心惟見蒼苔漫白骨請陳古人心君勿駭客言古人惟

一真可使風俗皆還淳殺雞不及林宗炊黍不候龐公
雪中安道興適盡坐上公榮樽已空呼酒徑勸君欲眠
即遣客嵇康巨源不為絕戴崇彭宣本相得徐庶失老
母密如玄德不能奪之臣嚴陵薄宦情狎如文叔不能
止之客包胥伍員不失其為友羊祜陸抗不害其為敵
我有蒸壺安事隱語我但食韭安用多種割肉元知方
朔真拏金豈即劉义勇古人心事有如此何至顏色相
媚奉道哀憐仁義世亂生姦雄君知臧否不掛口正慮

七首堪其胸我生恐無用我死知無聞作書預與兒輩
訣葬時定覓要離墳

贈墨工陳伯升

古墨法變今百年雪齋乃能幻神藥杜又膚清衛玠神
眼明再見老陳作墨如人意隨短長用之不盡渠解笑
須君筆端馭龍蛇他日始信入木妙

僕以紹熙壬子中夏二十有五始躋風篁計
龍井遂至廣福謁三賢像閱舊碑追觀一代

風流為賦此詩適月林依公留設茗供因書
以遺之他日能為我揭詩板于壁間使示來

者亦山中之一助也

龍井寺有辯才師趙清獻蘇文忠塑像

奇石攔橫道茲山信多姿江湖醜雨股一泓乃孤危相
傳龍所家或恐神護持腥風轉霍霽陰崖立淋漓惜無
緯蕭勇探此抱寶癡山僧作屋意慘澹生幽思胡為金
繆影顛倒眩俗兒坐來百念失蒼官道前馳招提來深
登履痕恍前期咄哉少肉山著此高顙師端能致遨頭

絕唱相娛嬉過溪亦何事相送了不疑渠能縛禪律因
來數鬚眉我愛秦郎記字壓頭陀碑月林只夜夜人物
自一時賢愚盡蟻封來者吾得知

佳人珮明月贈俞德章

佳人珮明月笑語含春姿手握幽蘭叢照影清漢湄少
年冶遊子行樂方及時折茗戲相贈玉色頰自持歸來
種白壁日漚文錦絲加幣欲聘君常恐歲月遲終然不
可諧翕歛聽所之願言遺鄉澤遠慰千里思

六月內喜雨詩

時寓崑山縣東禪寺西齋

炎天亦靳雨特地費雷將隱隱來何久飛飛勢稍颺初
從霑塊潤忽作建瓴忙穉子拋書出臞禪解縛狂苗滋
應秀穎風過忽溫涼蛛網掀三面蟲書漫數行余箱開
歲事恩澤到詩章怨暑移今昨煩疴覺在亡青蓮開紺
宇白苧舞彫牆隻影還晡暮驚心重渺茫思惟大火聚
迴向六時香脫略時流輩周旋古佛場身纔丈六足舌
乃大千長此理憑誰詰何方更舉揚鼠愁燈崛峩鸚鵡睨

鐵琅璫生理何聊賴斯文重激昂盛時追少壯故步失尋常政爾蓬心夢依然貝葉光

再次徐先輩二首

淺聞懲闕漏小學到凡將始制初龍遁流風漸烏颺
今緗帙富益我手抄忙半世真書癖衰年忽酒狂壯懷
邀汗漫奇服間龐涼身許羲黃上名卑崔蔡行知心履
幾量闕計木千章湖海堪流滯陳劉略喪亡每思辭北
闕直欲老東牆度嶺官憔悴藏山計杳茫尚方何日烏

侍女幾時香斂板予行役懷鉛子舉場翅垂雖一青腹
果自三長孰使多為累還成少不揚忽驚投暗壁曾是
獻明璫閱世肱三折論文首一昂結歡慚李札抗對敢
元常它日聯詩社前羞李杜光

身是韓康伯名慚許子將居然屯澤閉何得巽風颺憶
昔求詩甚端成刻燭忙出喉真自若舞手或成狂楊柳
偏歌雨蒲萄肯博涼羣兒哀齒舊諸武讓顏行禹穴魚
龍陳天門虎豹章陰符空獨佩秘論未應亡自築揚雄

欽定四庫全書

江湖小集
卷四十四

十

宅誰窺宋玉牆卿英殊磊磊俗物自茫茫被厲三精劍
寧神百蘊香諾交卹復社取醉莫論場高節看徐稚妍
詞伏仲長泥蟠雖汨汰韞掣會飛揚列屋多齊趙華穰
間壁璫從渠誇富艷試與校低昂丘喙徒三尺公才可
百常素交風雨盡雪涕魯靈光

畢叔茲可掃園賞牡丹

衣冠塞繁都茂苑非夙昔雙鋪俯行渠文簡相公宅是
家固多賢滿篋載春秋中有數畝園頗復修風流新亭

著高穩佳木行清幽客來必置醴井蛙挾其翰張燈看
洛花意作長門愁小却得一欣凍壁纏蛟虬先朝補天
手翰墨皆其遊再拜閱帝書局促虞褚歐平生實好奇
兩武布九州恍然駕閭風坐我曲池頭竹間是茶煙松
風助颼颼梅食亦登盤按行感良儔樵馬喧午枕土毛
擷晨羞似聞屋東偏萬指食鋤耰行當賣書籍買鄰託
羊求與公行灌園第一營瓜疇

四月二十三日始設酒禁試東坡羹一杯其味

甚真覺麴蘖中殊無寸功也食已得三詩

今日忽感悟閉門謝麴生未危却二豎不戰仇三彭掊
擊北海樽躋量東坡羹尚恨薄滋味未能免虧成我欲
嚙元和默坐朝上京坐待梨棗熟小試昇天行

評詩要平淡此語吾不然大千自有舌何用長短篇謂
是天送句端正落我前旋聞口吻鳴頗益心腸煎少陵
耽句佳欲以一死捐是中有真意靖節差獨賢

去夏苦多雨勢若無炎官今晨迫重午香黍仍膠槃

去聲

天機杳難測人言亦多端祇令原田上立苗未妨寒但
願含穎時借日開迷漫螭蛄爾何知煦煦啼夜闌

江湖小集卷四十四

欽定四庫全書

江湖小集卷四十五

宋 陳起 編

敖陶孫臞翁詩集

改周晉仙贈丁相士之什

張顛許我以神仙薛顛謂予可英傑丁生謂二俱無成
世間那得此奇崛麒麟閣上森貂蟬龍虎鼎內飛大丹
腰錢跨鶴誰不願只有圯下先吾鞭何如吳松江上住
門橫釣車屋農具卧看蒼虬擾白雲正午堂堂拔江去

奉寄旌德尉劉申之

諸劉兄弟賢一一無可選竹林銳頭郎風味吾小阮平生天機深善閉得內捷邇來卿何曹不辦折腰本梢傳詩語東朝日照蘭畹伊余戰紛華心旆凡幾偃劃逢君家語雋永初一變識遺飽新得友勝悟夙損緬懷歌商地蕭瑟松磴遠陰陰蕪菁花碧蝶相與晚是中著高士物意自偃蹇向來白衣宰雲壑論補袞優游濟艱難如以禹代鯀劉郎秀眉宇秋隼立高巘端能謝師匠萬卷

自鉏鋤時須閱世諦一及城門鍵功名頭上簪日月風
中憶何時會吳下春動長洲苑

送王郎

洽

車輪何由方草色欲無路晴川媚雙燕及此送將去若
人天機深奇服雅自與色溫無可鉏語妙時一吐相逢
大江上為我浣塵土後期豈前料已作千歲語告歸何
草草雙水深霧雨稍聞父老舊門戶要渠補祗愁模楷
地與世作誇詡寧當去樓梯閉置吾叔度翼翼吳齊門

大江流日夜別君雖咫尺即是風牛馬君才何如我我
拙猶肯借淮人買繡絲布洲市如赭張皇十日飲著公
喬松下畫工亦豈學愛玩此粲者人情勿苦拒輿馬幸
整暇向來三宿戀取別萬里駕想當雙玉瓶酣歌淚盈
把縹緲鴻鵠去吾甘老原楚

次韻張長公寵賜初度致禱之語

何人著書補獲麟竹汗未乾頭已星天上風流張公子
散髮滄浪歌獨醒威名徧滿淮草木肯借妙語春冥靈

臞翁之腹無三壬平生貯書纔一丁泥塗斷道學龜曳
雲天潑眼慙鸞偉亦知封侯下曹掾寧與阿堵高寧馨
夢從諸兒坐家塾十年燈火寒青熒分無黃色明天庭
獨倚一片藏無形虞翻骨相當自程曲江風度乃不名

上閩帥范石湖五首

人物于今正眇然欲從江表訪先賢邇來耆舊無新語
誰使文章漫兩川利器蚤能誇穎脫偏師聊復制中權
騷人有幾登青竹耐可同時欠執鞭

今代論文更是非
賞音誰復得
牙夔直從長
慶成編日
便到先生晚
歲詩萬馬
蕭蕭閑律令
孤峯隱隱出
旌旗
了知長短三千首
收拾餘師即我師

丁年征伐真奇事
一代詩鳴不救貧
大手欲推浯水頌
遠夷曾折石湖巾
乃今謝傅還初志
其奈王陽是故人
獨有吾閩欠公句
詔書果起釣磻濱

此行闕嶠吾能數
行盡天南未了青
莫倚看山韜墨本
要須入界挾圖經
西湖楊柳雲生鏡
東阜離支錦作屏

欲託翁冰鳥石篆諸公作屋與新銘

蚤知吳下多奇士身許先生嫡子行他日略容追李杜
斯文何敢望班揚向來流水孤三奏此去飛霞乞一翔
牛鐸調宮吾豈敢噓濡萬一借聲光

代人壽度支郎中李嘉言

李下老人龍作儔談經閱世無春秋一朝函谷占紫氣
萬里西極行青牛青蓮居士亦其裔太白淪精來謁帝
江東狂客漏神機一號謫仙人得制天人驚世時一班

文采風流有遠孫百篇斗酒真細事郡有德政朝功言
晉陵坐嘯列城祖一札細書風九土為郎不用漢山錢
度支事繁通會府向來供億寬艱虞祇今笏畫通材須
裕農足國端有道判花視草皆夷途金魚玉帶公所有
太夫人高松栢壽綵衣板輿堪作圖巖巖閬州陳母後
人間盛事省見稀王母一笑攘桃兒花明柳暗白日靜
鶯穿燕颺青春遲請君酌此西湖水萬歲千秋佐天子
清明寒食數日間謹勿拋擲為佳耳

登蘇臺用袁憲韻贈兩趙提幹

汝積
幼聞

勝賞多從暇日違
眼中朋友欲星稀
退休不復思三顧
能賦猶堪廣七依
遊鹿臺前空逝水
棲鳥曲裏只斜暉
書生懷古真癡絕
看盡閑雲入棟飛

次韻萍鄉文叔章訪別

力田望逢年倚市勝
刺綉十年丘里語
失火要自抹君
行半天下何處得
耆舊請從老龐說
龍鳳相赴湊全家
隱鹿門遺安不求
富常時拜床下大
鐘盡徐扣男兒惟

一身用在百歲後譬如營屋室宗廟先庫廩不聞買山
隱而有居巷陋君看鍾鼎家梁肉或墨瘦寧為賣文活
一經老學究出身即九折時命迺大繆向來尸裹革口
語困逗留居然齒編貝月粟供賃僦何知山澗底鹿豕
對飯糗文章忌隨人謹勿誇客右書林無淺植筆未有
深耨紛紛青紫檀後進渠領袖結交兩任昉設客一陰
就卑官慚處贈俚語致公壽

高郵因師蒲萄蘆鴈秋瓜三種

漢家士馬知多少晚得蒲萄繞院栽何物支郎能伎倆

龍鬚馬乳應時來

蒲萄

莫話淒涼塞北秋銜蘆避弋使人愁與君細展江南畫

水宿沙眠得自由

蘆鴈

子母鉤牽曉露溥行人暍暑慰艱難青門種色今餘箇

莫作黃臺秋盡看

秋瓜

用香字遺李恭叔

我無令君三日香瘦鶴為軀龜作腸薄寒中人曳雨縱

獨吟猗那遺我將憶從兩脚萬里回政坐羣兒相謗傷
却來一見老柱史城郭落落歸靈光安得與君壽六龍
探借千歲北斗漿却乘斑虬訪月窟盡斫惡樹無留藏
天風泠泠吹佩環洞視碧落豁四旁下方應奉正三入
閑置可憐青瑣窓

再用晨吐字韻寄潘德久

舍人賓日姿起居庭燎晨豈惟瑞朝廷薦紳目多聞麗
如田甲謝死灰果不然那知碩果剝中有一念仁稽古

得微酬樞具我進賢琴為悲風彈茶必活水煎平生轉
庵詩小當壽千年忽聞朔方騷更欲腰黃間向來樸朔
豪日者今華顛下客時覘君車茵陽醉吐萬事君不理
傳聲拒開戶雖然臭味合更覺心貌古書讎嶧山棗羹
臙首陽苦坐令府西門平輿平說二許君當我輿臺銀
父心已灰尚有西山緣共待石髓開神仙覺易與詩句
端難裁却後五百年化鶴吾獨來

訓答李學長

海門縣學有三忠堂陳了翁任
伯雨龔夫雨薄解負牆甚通

夫子焉不學高朕羅三賢橫前一片石教外皆別傳三
虎誰最怒未覺相後先渠伊囊中方貴在後者鞭我家
一佛堂蓋背知廟堧憶昨祠上丁黃燭初欲然諸生氣
清明人如出雲泉洗爵俯象鼻掩豆高豚肩朱絃張文
王繁聲斥師延此時識方屨綦滿青苔錢李公獨鳳儀
衆中得何堅惜無補天手轉之上細氈朝來食盤中稱
蕨初數拳蒼蒼本難測何由蹟真筌自我得此士可以
一當千如聞縫掖姿欲重世所捐春容吐握詩法用春

秋全訓贈無玉案三復緇衣篇

大風懷林伯農

江湖易高風六月寒
痒痒中宵會急雨涼意到衾枕
顛披蒲葦亂抑壓烏鳶噤
禾頭欲生耳樹背各流瀋不謂
鋪朱霞橫拖半天錦
初疑鴉翻晴旋覺虹投飲
晦明信難料
暘霽吾誰諗所思隔江水
筆力望徐沈十年一葛
衣肘見尚整衽想當風雨夕
憂國願歲稔淒涼新豐邸
避濕幾違寢何由語連牀
共破秋氣凜

醉歌贈鄒孝忠

老鄒草檄如吹律能令陰谷回陽春
手提赤心獻天子布衫麻鞋驚市人
戈船上噓五里霧詔發內府捐金銀
進賢冠者不好武歸來結屋看濤雲
却回孤憤與江浪氣壓千人萬人將
或時飲就夷門屠亦有搗摻漁陽唱
埋名袖手君得醉行宮今在江之湄
高帝遊魂正思沛太王有道聊居岐
一杯屬君當起舞能令公喜令公怒
掉摩青山鬪兩虎搜攬中流鵝鵲語
平生未受噲等伍

圖中褒鄂爾如許於爍皇師者其武我願為公前負弩

次韻張宰牡丹

羯鼓勿罷弄吾琴無成虧潘桃既無賴陶柳自不持造
物有鑪錘攬之杜拾遺卷簾出傾城一笑不用惟輸心
巧當面珍重來如期人為曲江秀花自潛溪移美人欲
晞紅鏡中覩東施如聞姚魏風紅紫合折枝常恐研光
帽半倒金屈卮作詩苦留春出吻竟不奇但常聞幽間
屬賦歌載馳慙慙禪靈錦丈尺餘丘遲公杯當再行雉

邊多小兒

上鄭參政四十韻

乙亥

吾聞天下選人傑聖時蕃佐戴高前謀承家裕後昆海
門當劔立洋嶼焱鵬騫氣色來迴互者明有討論蟠胸
三萬卷落筆五千言地芥垂頭拾天瓢信手翻餘陰潤
桑梓賸馥到蘭蓀白日騏驎坂青春桃李園揚鬢方澤
國插羽已天關伊昔昌能諫於今朗獨尊夙驚山有虎
已驗鹿隨幡帶草書籤麗金華講舌溫履聲仍獨上驛

置愈爭奔有客迷途甚勞公倒屣煩請先陳失馬次第
說投猿漳水頭堪白融峯淚幾吞嵌敬辭故里觚角見
修門到遮吳蠶宿留交楚鴈番忽通狂客刺俄返獨縲
魂望祿蒲生節隨人柳折園天高難發口地縮會移跟
一昨哄堂暇深知納牖恩印刊聊小靳縕束更能存日
者叨堂貼時哉會氣元敢言矜驤裏復自妬嬋媛未學
應須授羣經剩欲繙恐因鱣發發復作兔爰爰光範寬
無闕階符紫有垣極知專造化稍許展寒暄國論圖南

紀邊防議北轅未將蝨火界忍使彗旗燔天步曾留跼
皇心重改幡房奩非久祕藥籠會深掀豆棧能忘秣稊
材儻入掄略容偷廩稍重議洗乾坤舉邑多狷犬深心
寓祝狔老身難矍鑠疾眼久眇昏合浦珠無脰豐城劍
有痕事多慚蹇叔議敢及臧孫餘日知安在南村定北
村

體齋詩為梁谿馮季求作

口腹不自主來吟體齋詩三肅齋中人問體安措辭體

卑語近拘體高語近欺耳目口鼻形人各師其師要之
天地間當以一理推馮侯好兄弟一一清廟姿是家好
談道脫略毛與皮一堂春悵悵詩禮相娛嬉但媿遠客
塵浣子連理枝雖然參自訣要知不磷淄我車得國工
分路有險夷君知魯叟聖妙在物不遺當其作春秋一
字如權錘越竟惜趙盾斷謂此語非俗儒無已心望道
如隔紕閉門畫圓方用世多參差千載堪一咍汝足未
及噦馮郎顧我笑坐久鑪煙遲黃花粲牆東青山轉牆

西吾言亦已費須君浮一卮

予客崑山得薦嚴長老時道人散朗間遠不交
人事心甚敬之今來海上復得悟公老成疎
練能言吳中山水人物甚詳東軒種竹如雲
不問其人可知也一日忽起故山之想予語
悟野田荒草在處愁人心目安能復作瀟山
之牛乎因作一詩言君子出處之大致以告
不知者

平生庾公塵可浣通州泥竭來海門上日瘦氣慘淒春
風有相導佚我以闔閨前身定聞法夢作三生猊悟公
癡鈍禪迎客忽虎溪招要得半席紙帳春繒綵東軒養
蒼雲犬似開昔迷計程南山北托宿東院西絕憐維摩
牀而置法喜妻是身於虛空了不礙角圭四大師本無
容亦何所攜頗聞弁山隅髯松作兒啼山神喝連聲已
受三十篋豈知滿山牛未脫靶與犁去來同一雲未覺
道理睽幸勿使竹歸留與老鳳棲鑿齒恐無對後期當

噬臍

詩評

因暇日與弟姪輩評古今諸名人詩魏武帝如幽燕老
將氣韻沉雄曹子建如三河少年風流自賞鮑明遠如
饑鷹獨出奇矯無前謝康樂如東海揚帆風日流麗陶
彭澤如絳雲在霄舒卷自如王右丞如秋水芙蓉倚風
自笑常蘇州如園客獨繭暗合音徽孟浩然如洞庭始
波木葉微脫杜牧之如銅丸走坂駿馬注坡白樂天如

山東父老課農桑言言皆實元微之如李龜年說天寶
遺事貌悴而神不傷劉夢得如鏤冰雕瓊流光自照李
太白如劉安鷄犬遺響白雲覈其歸存恍無定處韓退
之如囊沙背水惟韓信獨能李長吉如武帝食露槃無
補多愁孟東野如埋泉斷劒卧壑寒松張籍如優工行
鄉飲醕獻秩如時有詠氣柳子厚如高秋獨眺霽晚孤
吹李義山如百寶流蘇千絲鐵網綺密瓌妍要非適用
本朝蘇東坡如屈注天潢倒連滄海變眩百怪終歸雄

渾歐公如四瑚八璉止可施之宗廟荆公如鄧艾縋兵入蜀要以嶮絕為功山谷如陶弘景祇詔入宮析理談玄而松風之夢故在梅聖俞如關河放溜瞬息無聲秦少游如時女步春終傷婉弱後山如九皋獨唳深林孤芳沖寂自妍不來識賞韓子蒼如梨園按樂排比得倫呂居仁如散聖安禪自能竒逸其它作者未易殫陳獨唐杜工部如周公制作後世莫能擬議

此評子姪得之為多外自寫兩紙其一以遺莆陽

劉潛夫其一以遺同舍朱仁叔二公皆知詩者且
其語疊疊逼人故為之書嘉定八年夏至後二日

長樂教陶孫



江湖小集卷四十五

欽定四庫全書

集部

江湖小集卷

四十六至
五十

詳校官中書

臣張姚成

助教

臣

常循履勘

覆校官主事

臣龔敬身

校對官助教

臣胡予襄

膳錄貢生

臣苗序洙

欽定四庫全書

江湖小集卷四十六

宋 陳起 編

朱南杰學吟

垂虹亭

憑虛蝦蟇逼人寒中有危亭百尺寬
天接水腰呈絕景風回帆脚漲狂瀾
半篙落日吟將就一抹晴煙畫亦難
不是酒杯今日窄直須邀月上欄干

舟行過平江

蹤跡平生馬少游功名外物等虛舟不多飲酒常成醉
自在吟詩祇解愁已幸一帆離錫邑更寬兩日到杭州
曉來忽見盤門塔疑是西湖大佛頭

楓橋灣酒家有楓橋千古壓波光之句用韻以
紀所見

楓橋酒味勝官坊隨分紅裙取次粧月照乍圓新氣象
僧閑不減舊風光一橋地勢橫分水兩岸人家競採桑
惟有塔鈴大多管笑人來往自玎璫

出嘉興

舟出嘉禾五里城僧模山塔互崢嶸酒旗密比隨風舞
漁網橫拖漾日晴畫舫貴人帆去穩單衣遊女著來輕
山歌已接長河堰到得臨平月又明

過長河堰

帆指長河風力微漁舟箇箇有魚歸一聲水際笛三弄
幾處梅邊竹四圍桑伐遠揚蠶事熟花消濃艷柳綿飛
西湖只在錢塘外又見孤山梅子肥

同劉朋山遊湖邊作

誰立西湖造化功，峯分南北境相通。
四時風日絃歌裏，兩岸人家圖畫中。
堤柳送迎忘爾汝，棹聲來往自西東。
風波便作恩波看，此樂君王與我同。

同陳明叔遊湖作

四月湖邊冷若秋，先賢堂下繫扁舟。
山頭積翠來新意，波面飄紅憶舊遊。
無奈楊花欺倦客，已多荷葉護輕鷗。
堤邊誰道春歸了，猶有一聲黃栗留。

和吳嘯石韻

春回筆底露潛機為怯高吟且遯肥
又見牛鞭春到日羞披鶉結舊來衣
雪隨著處分單厚梅不關人自密稀
歸計商量今始定樂哉心事看雲飛

春日呈嘯石

朝來慚愧又逢春總把官身換客身
堤柳未歸新氣象牕梅猶帶舊精神
村居牢落誰沽我吏醉清閒却笑人
打疊故書排日去一樽隨意踏芳塵

南園不與昔時同，綿亘規模十里通。
萬石倚山如踞虎，一亭跨水似垂虹。
虛堂舊占梅邊月，曲徑新添竹外風。
詩料滿前吟不盡，主人樽酒未應空。

壽實齋侍郎王先生

崧高維嶽誦生申，整頓乾坤屬舊臣。
天下安危關出處，性中存養自真純。
便歸紫橐酬公論，已草黃麻授正人。
天為皇家錫難老，願將霖雨福斯民。

七夕呈坐間諸友時留平江宿和靖書院次日

葉已鳴秋夜漸長年年織女會牛郎龍梭暫歇七襄駕
雲袖輕飄百和香輸我晚涼和露飲任渠明發渡河忙
要知工巧元無用樂得身閑拙不妨

和吳梅庵同登白龍對月韻

秋容滿目帶微寒帆穩蘭舟駕碧瀾照我湖光天共色
襲人花氣露初乾笑談紅袖日中舞驚動蒼龍水底蟠
最是一清無著處却慚狼藉草杯盤

餞徐衍道知縣

事業文章屬當家刃游餘地宰金沙挽回凶歲作豐稔
安集流民歎絕嗟兩載秋霜滅盜賊一犁春雨沃桑麻
寬民實急言難盡勝種河陽滿縣花

餞海鹽史後樂

秦溪邑大號難治後樂三年以德為海濶有樓還舊觀
堂深無日不新詩虛舟祇載來時物實惠常教去後思
相業真傳公不忝蒼生況是望霖時

朱知鎮戎服警盜不憚雪夜酒庫在鎮外不得

與戲呈

戎裝元不礙儒冠盜賊潛窺膽自寒
金鼓聲聞三里外
旌旗影庇四民安肯從叶力多君子愧不同盟是酒官
和氣釀成年可卜曉來喜見雪漫漫

除夜懷劉朋山為坑司幹官

丁未

決脚糟丘又一春歲除牢落頗關情誰家不換桃符句
比屋相聞竹爆聲舊友未知能鑄冶新年宜入孰陶成
來朝無甚人交往樂得齁齁睡到明

夜坐書懷

挑燈看徹後村詩，忽爾憧憧有所思。
不待人言已知錯，要知分定盡如斯。
但求甘旨安無事，浪說榮華自有時。
倒指新筍當已熟，且煨閑芋一中之。

曉發嘉興府

曉發嘉興府，人家門未開。
閘關船側過，水漲堰平推。
濃綠暗官柳，肥紅綻野梅。
城中簫鼓發，知是使君回。

舟過吳江縣

寺滿吳江縣鐘聲兩岸分買魚嫌少室沽酒欠文君平
地橋邊浪無心嶺外雲篙人添德色為策過湖勲

泊崇德

堰未抵長湖先從古縣過詩舟尋舊岸酒市鬻新歌傍
水人家密依山僧寺多夷猶觀未足無奈月明何

東新橋值雪

間關入帝鄉飛雪斷羈腸天地皆明白山川忽老蒼柳
眉遮舊影梅額上新粧客裏急先務湖邊問短航

甲辰入京春深猶雪和吳嘯峒二首

歲事客裏過今年祇去年甘貧長寂寂知己孰拳拳花
艷卑崇帳江流羨祖鞭家山芳意動野騎盡言還

掀髯論時事莫問是邪非綠句池邊得青陽柳外歸夜
深嫌薄酒春淺怯單衣門巷雪撩亂低頭且掩扉

富民犯米四十字以喻之

彼此有人心人心即訟庭初無深利害倒自費調停私
意生荆棘公家有典刑落便宜是益座右可刊銘

孤山觀梅

費盡年年造化功精神全在雪霜中一枝映帶窻前月
消得逋仙作主翁

陳梅隱求詩

早歲走江湖那堪又歲除隱梅非活計行李盍寧居自
有珠璣集不攜朝貴書酬君無好語索笑謾躊躇

林竹翁求跋

何物耐交情林翁竹借名霜嚴不改操風勁鎮長清袖

裏森珠玉胸中富甲兵江湖莫相笑已播逸民聲

書考

戊申春

人說宦途好元來是險途不親真利害難話細工夫下
考初書一中心有愧無官卑何展布三載且糊塗

劉直孺示拙逸詩編且命著語

拙是愚中來逸與怠相比限界固分明差忒亦容易人
心自有機天下本無事更參大學章終始一誠意

尹樓岩久留華亭

風雷昨夜揭窻紗未信樓岩不憶家和靖山頭春到了
莫因尋鶴負梅花

攝事華亭歸舟口占

挈來司市正花時補陋支傾費品題顧影自慚身是客
片帆又逐曉風西

延陵道中即事三絕

筍輿取道自吳千東作村村喜一般已拜勸農田畯賜
舊租何似放令寬

人家密簇近溪旁，舊袂青裙競採桑。
相喚相呼相歎息，重絲歲歲為官忙。

小立青帘賣酒家，味雖薄薄勝空茶。
今年春滿疎籬外，數朵輕紅出杏花。

題吳梅庵和靖索句圖

童寒鶴冷雪霏霏，正是先生得句時。
一段孤清圖不盡，梅花從此厭人詩。

入京

客懷醉殺也醒醒昨夜思家夢幾驚道阻且長無信息
只將喜鵲驗安平

橫林遇雨

斷當篙師到錫山片雲厄我竹林間短篷展轉渾無寐
祇聽郵鈴去復還

雨濕桅竿風颭帆不禁篷漏滴衣單蒼頭更說無眠處
始信人生行路難

自庫入鎮十二里皆山徑邢侯以馬相招道間

口占問梅

蹇驢突兀萬山間
欲雨還晴雪又慳
一路梅花尋不見
多應開向小溪灣

豈敢言詩聊以紀時固不止是錄其可以示
人者淳祐戊申中和節南杰書於澈川酒邊

江湖小集卷四十六

欽定四庫全書

江湖小集卷四十七

宋 陳起 編

余觀復北窻詩稿

讀柴桑集

游心太古初得句萬物表平生一罇酒寂寞三遙小有
琴不張絃正以知音少伊予挹殘芳道心炯相照北窻
清夢長山間自啼鳥吾欲問先生天濶白雲香

咏懷

山容洗眼青江光照肌白翻枝鵲查查抱葉蟬嘖嘖兼
葭搖風聲梧桐淡秋色草木了無能陰陽互相激人於
大化中真成逆旅客藏舟夜半移不假貴育力塵網罩
八紘貪夫受羅織蹇予丘壑姿一室頗安適荒尋縱奇
懷清詭弔塵迹風搖泛海槎雨澁登山屐世遠事荒唐
風高興寥閭渺渺孤征鴻一舉振六翮此意人莫知獨
嘯巖扉寂

寄伯成

昔別青梅酸今來黃葉墮
葉墮卻歸根窻隙見駒過
大巧亦自然小智空瑣瑣
一言取封侯千金賈竒禍
達人知倚伏去就無不可
天公亦可為妙用正在我
風雅不可復亦乃世代然
君看黃初語已減河梁篇
神思透溟滓至寶辭雕鐫
儻欲剝著語不如寂無言

梅花引

耕銀雲鋤壁月裁得寒花寄愁絕
陽和一點來天根春滿江南誰漏泄
珊瑚作樹玉為膚沉水薰香檀吐屑野

橋橫寒澗潔斜梢舞破屋角烟老樹壓殘牆角雪風流
不肯王謝倚孤高尚笑夷齊劣蕭然與俗最無緣此話
難明向誰說絕愛西湖君暗香浮動月黃昏亦愛東坡
老竹外一枝斜更好二仙去矣花寂寥著語壓花花不
倒誰能淡筆傳其真誰能楚語招其魂參橫月落興未
了三咩花神聞不聞花影搖搖情默默冷透吟脾醒醉
魄問渠桃李豈知春西抹東塗愛春役自然香無色色
譙樓角動霜初飛蕭寺鐘鳴天欲白披衣遶徧樹頭行

判斷人間風月國

梅花

羣卉皆輿隸孤標真聖賢
乾坤清不徹風月興無邊
生意春常在貞心晚更堅
騷經雖不載已入二南篇

山居即事

密竹環茆舍應無俗士過
睡濃嫌日出坐久厭塵多
鬬雀翻危葉饑鵲啜短莎
世涂真九曲犇走欲如何

梅花

自是孤芳集大成紅紅白白漫爭名
天邊差有雪堪亞
世上更無花敢清
筆到花光空幻相
句如和靖藹遺聲
一枝勾引窻前月
冷淡相看太古情

次韻春日

日淡風輕養物華
老天將此付詩家
人情巧似營巢燕
春意忙於赴壑蛇
寂寞蘭亭空有感
淒涼金谷竟誰誇
絕憐狂甚樊川杜
枉殺吟情豈翫花

次韻

稻簇殷紅竹迸青風驚簷玉一時鳴晚來幽趣無人解
流水聲中看月行

步遠

步遠蒼苔自詠詩吟情惟有澗泉知山猿忽地來偷果
攀斷庭前烏桕枝

木犀

盤盤老桂樹金屑黃龍鬆字此無盡香襲襲乘西風幽
人為延佇古意滋無窮王孫招不來西郊草蒙茸欲以

遺遠者道阻嗟難從

關

不忍替搯之寄房櫳夢魂恍

而清夜午起鴻濛常恐芳氣歇我恨何時終

江湖小集卷四十七

欽定四庫全書

江湖小集卷四十八

宋 陳起 編

王琮雅林小稿

北山訪僧晚歸

吟僧山北住又買過湖船半日得閒話一生無此緣波
光搖酒興竹色帶茶煙歸路斜陽裏徐行聽亂蟬

蓬萊

柯山
倅圖

一棹三萬里何修入窈深水痕涵雨意巖影帶秋陰雖



愧無仙骨終能長道心古人殊錯計空向海中尋

讀書樓作

近來閒過日幽事頗相關
遠樹開晴晝歸雲當晚山
宦情隨處薄詩稿逐時刪
骨若無仙分何因住此間

哭潘令

河陽桃李樹惆悵不逢春
官為吟詩折家因好客貧
故山歸去遠遺像挂來真
誰向江頭哭共鄉三數人

三巖

閑攜一壺酒來對雪巖斟秋老瀑飛瘦石寒雲宿深坐
無僧共話行有鶴隨琴此處儘不俗令人生隱心

題獨醒小亭

東嘉酒舍
予所創

退食多留此翛然一散襟涼從曉來覺秋向雨中深牆
竹侵山色簷茅雜柳陰有誰能載酒過我共幽尋

挽何耐軒

調度如儒素相門中所難一心惟好佛半世懶求官星
近緹屏落墳依宰木寒遺恩滿溪麓魚鳥亦辛酸

客裏有懷徐太古

近來真倦客，怕蹋軟塵紅。
獨向一樓坐，靜觀諸境空。
官河添夜雨，宮樹帶秋風。
還憶能吟者，襟期何日同。

與劉天游伯仲夜話雪中戲贈

水亭新得月，坐對白蘋洲。
共說一夜話，惜無多日留。
手抄詩許借，口誦咒如流。
最羨同吟處，對床風雨秋。

秋夜有懷醉書十韻

秋風從何來，颯颯入窻牖。
殘燈耿不寐，照我容顏厚。
故

園豈不佳亦頗興懷否黃金桂百樹碧玉池十畝猿鶴
響空山亭臺映疎柳觥籌雜莼蕪筆研得佳友愁無彈
鵲句雋有持螯手人生行樂耳功名有時有點檢屐幾
兩土苴米五斗浩然歸去來萬事不如酒

城西即事

清曉離家去路遙絕憐寒景太蕭條松深漸覺風聲緊
雲動還知雪意銷沙嘴客擔魚種賣山頭人拾樹枝燒
梅花多處誰家酒斜舞青帘隔小橋

次韻項君玉

惠然乘興訪幽栖
細雨冥冥濕杖藜
七尺身強於鶴瘦
一生心不向人低
日尋靈藥行寒麓
時有新詩付小奚
欲解貂金同一醉
酒罏聞只在前溪

答友人

秋山曾是共登臨
感慨蘭亭後視今
炎熱不過能炙手
笑談未必到知心
前言袞袞風波去
後約寥寥歲月深
室邇豈應人自遠
酒盟詩社要重尋

京華病中

自移藥鼎在床頭，桂玉令人分外愁。
因病始知歸計好，雖貧不向俗人謀。
僧曾帶雨來看脈，僕為傷風懶上樓。
賴有壁間新買畫，寒燈相對兩山秋。

客南徐一首

秋來客裏幾蹉跎，醉缺唯堪浩浩歌。
盛世未應知己少，諸公自是閱人多。
潮生瓜步風猶急，苔滿浯溪石欠磨。
憶昔祖生忠憤後，更無一楫是如何。

次韻徐獻可兼別重巽

誰憐范叔戀袍寒猶有徐卿二子看
大率率中多物忤相知知到此心難
最憐風雪分吟筆安得江山共倚闌
後夜小窻懷素帖挑燈應憶我同觀

代辟客送總卿歸吳

使星卿月照淮壖百萬貔貅飽據鞍
出處豈無公論在規模應有後人看
半年水驛衣猶濕一紙天箋墨未乾
事與心違知已異折梅花別歲之寒

鄴中書懷

苦無官況莫來休
羞見傍人說宦游
九十日秋蛩共語
兩三夜雨鴈供愁
腐紅只有虛名在
堅白難將實意酬
驛路梅花歸正好
苦無官況莫來休

喜趙居父赴班

西臺自是舊相知
來了為山一簣虧
入幕雖無多日在
攻書已是十年遲
金閨接武人爭羨
玉牒能文世所奇
此去錦鄉纔兩宿
仙茅綠景正堪詩

題多景樓

秋滿闌干晚共憑殘烟衰草最關情
西風吹起江心浪猶作當時擊楫聲

漢荆王墓

廟在京口府治

落落廟碑摹瘞鶴陰陰宰木宿神鴉
可怜寶劍凌雲氣散作金燈滿地花

獨醒午坐

小槽停溜務廳閑幙府文書省却難竟日徘徊無俗意

祇因竹外有秋山

旅興

經年客食向京華
懶對春風祇憶家
覺道近來全俗了
略無一語及梅花

客中從厚祿故人乞米

范甌欲塵貧亦甚
陶腰未折計何如
小窻獨對蕭蕭雨
臨得唐人乞米書

舟過孤山

寂寞梅花處士林竹圍巖脚一泉深
隄時翠輦曾遊處
水鑰年年護綠陰

秘省金魚池

落葉闌干小立時
諸公慨想到腰圍
但知官餠堪為餌
不識人間有釣磯

觀潮

旗彩斜飛一命輕
舟人却立萬舟迎
不應當日將軍事
猶到如今氣未平

獻可約游北山阻雨

共約湖邊喚短篷
曉來何事雨兼風
山林只合閑人到
不入時官眼界中

立春有懷

十千呼酒醉長安
猶記年時客裏歡
有約南山南畔去
只挑野菜當春槃

江湖小集卷四十八

欽定四庫全書

江湖小集卷四十九

宋 陳起 編

劉仙倫招山小集

中秋有懷

吾廬有寒梅老幹秋風多上有雙棲鳥夜月聽我歌一
別三載強梅影應婆婆鳥今來不來柰此明月何

梅樹秋

誰將和羹姿植彼江之墳老葉才脫柯生意覺已欣寒

流帶孤標淡月寄一痕莫作搖落看不有春風根

水楓歎

楓葉不耐冷露下燕支紅無復戀本枝策策隨驚風鄉
來樹頭蟬去盡不見蹤日落秋水寒哀哀叫征鴻

得蟹無酒

水鄉秋晚得白蟹望斷碧雲無酒家此意淒涼何所似
淵明醒眼對黃花

盱江道中

過雨青山啼杜鵑池塘水滿柳飛綿田家正是忙時節
女採桑歸男下田

有懷二小姪

殊鄉憶諸姪觸緒成歎嗟阿獐蚤失父乳乳垂兩髻已
知陟岵悲啼哭聲啞啞阿顓幼豐下出入常隨爺別時
俱學書落紙翻老鴉倒指今三年為學當日佳應解對
我兄言叔不還家何時重抱持課書賞梨楂看渠俱成
人憐我雙鬢華侍我兄弟醉會當相扶義

贈曾相士

大曾兩眼如磨銅坐上一顧凡馬空發天機緘被天惡
老死不遇悲途窮小曾短小眼如鶻冷地看人看入骨
誰云輪扁不傳心獅子還生獅子窟倒拖拄杖行九州
平生慣識公與侯得錢送家養老母衣袂慘淡行囊羞
我慵百事不入耳休說功名老無味它年相伴竹溪頭
同採芙蓉渡秋水

西林留題

路入康廬西復西翠煙深處著招提山僧幾輩雪垂頷
水鳥數聲雲滿溪莫對青山談世事且循粉壁看留題
禪房夜臥衣裳冷夢破鐘聲落月低

盱江驛舍中有婦人書一憶字筆勢頗姿媚游
子明王相之皆題詩其後率余同賦

陽臺雨歇行雲杳天濶鴻稀春悄悄鷓鴣孤眠怨芳草
夜夜相思何日了妾非無聲不敢啼妾非無淚不敢垂
柔情欺損青黛眉夢魂暗逐蝴蝶飛春風著人瑣窻綠

綠窻書字寄心曲細看香翰婉且柔中有閑愁三萬斛
向隅弃筆惆悵時此情默默誰得知無緣相見空相憶
不如當日休相識

盱江道中

屈曲清江遠徑斜綠陰深處隱人家嵐昏山色未還觀
水落漲痕猶在沙麥熟村村喧水碓蠶成處處響繰車
馬頭忽覺清香近路轉橋南有野花

挽万知丞

大策雄文屢決科可憐身世竟蹉跎
韋編絕後門長閉
衫色青時鬢已皤
楚澤風煙閑簿領
藍田松竹飽吟哦
詩魂今夜誰招得
奈此西山暮雨何

哀青樓曲

東風吹衣樓百尺
青錢喚酒春壺碧
樓中女兒顏如花
欄干徙倚春無力
翻騰舊曲偷宮商
顧曲豈怕周家郎
態濃意遠淡梳掠
依約風韻追韋娘
樽前時復度芳畷
長恐秋波落金盞
自言流落小民家
似恨相逢成太晚

吁嗟綠綺琴絃絕無知音行雲忽何處十二巫山深巫
山深兮君不來春無色兮意裴回夕陽下兮猿叫哀可
憐宋玉空多材

送徐淵子知縣二首

君作西昌宰人如太史賢化行黃犢外心在白鷗邊訟
理無公事官清祇俸錢蓬窗載書畫頗似米家船
城郭春寒夜郵亭小泊時相逢一樽酒共說十年詩風
雨成輕別江山莽後期著鞭從此去早到鳳凰池

過嘉興

惆悵嘉興路三年幾度經
航船連夜發更鼓隔城聽
落月低烟樹秋風冷露螢
客懷容易感宜醉不宜醒

陳惟定得蜀墨一笏于觀音老僧磨試奇甚落
刀中分賦此為贈

吾聞蜀道如天高寸步千嶮愁
猿猱蒼官老據岷峨上
誰肆斬伐焚其膏生剗長鯨割其白
丁當萬杵春成膠
甄陶出此數寸玉山靈
河伯俱啼號蜀人寶之夜光發

六丁竊取潛遁逃，龐眉老僧打化得。要與祇樹供題抄，
却憐南澗詩壇豪。贈之為染霜兔毫，欲令拍肩李供奉。
脫靴醉換紅錦袍，梅坡覓句心七切沉著無處安。推敲
陳玄嫵我，窘到骨隨世。冷煖成絕交，賢哉南澗得此寶。
中分肯落并州刀，得之欲顛喜欲舞。助我詩思來滔滔，
自臨清流洗破研。赤腳不怕風霜餐，歸來小試病風手。
玄雲滄滄生煙濤，未能接武居螭虬。萬古一筆定貶褒，
為君且費千幅紙。鴉兒大字書離騷。

熊帥生朝

南極星明夜未央將軍初度近重陽平生忠義心如鐵
今日棲遲鬢點霜沙漠草凋邊馬健玉關秋老角弓強
朝廷緩急須公出更看黃花晚節香

以騎驢鍾旭送秦先之

髯鍾矍鑠老據鞍曾入大內見阿瞞幘頭垂脚藍綬敝
不知班簿為何官天寒歲晚日云暮霜風吹驢耳卓豎
老臧負笠衣裳單反袂掩口趾穿屨葦門我恐難留君

收卷送似秦將軍將軍文事有武脩眉骨自是凌煙人
汝當訶護謹厥職勿但縮頭徒掛壁將軍來歲在殿巖
豐汝牲醪作除夕

秋夜長曲

秋夜長秋月明愁人不成眠搔首行中庭天高氣肅萬
籟息銀床凍損寒露零碧梧已蕭條棲鳥中夜驚枯荷
倒秋水夜氣冰流螢銅壺悲咽漏下澁深閨何處鳴寒
砧亦有朱門人環坐圍娉婷玉觴催喚酒銀甲紛彈箏

衣篝龍腦熏綉被珊瑚枕煖愁鷄聲秋夜長秋月明此時幾人知此情

魏塘道中

霜葉紅於染寒溪湛若澄幾聲歸鴈急數點暮山青淺盞頻斟酒長塗小作程萬緣天已定得喪一毫輕

題惠崇鷺鷥

清霜著木高柳枯驚風獵獵吹寒蘆蘆根敗蓼色慘澹沙嘴無復孤與蒲風標皎皎四公子來從西雖有閑思

肝腸澡濯秋水清
雪衣不受泥土滓
偶得一飽即自如
鵬飛萬里何關渠
出離風波岸上立
豈只臨淵常羨魚
惠也小景稱獨步
那知寫生尤得趣
傍邊謹勿生機心
恐即長鳴過溪去

江亭晚望

瘦筇支我碧波灣
小倚危亭取次閑
斷雨挾雲歸嶺嶠
怒濤推月出雲間
猿啼遠樹家何處
鴈斷西風鬢欲斑
歸計未成秋又老
浩然無語對南山

仲立於枕上和余韻夜半得句敲門喚余余乃
攝衣而起相與對語于野航橋上殊為勝絕
因再用韻

夜半詩壇喜解圍楚天雲淡玉繩低撞鐘自得興不淺
泣鬼初成人未知踏月過橋驚鶴睡犯霜對語伴烏啼
蕭條此意欣重見絕勝圍紅醉玉卮

李泰伯祠堂

城西泰伯舊祠堂碧蘚斑斑草樹香曩昔功名雲樣薄

後來文字日爭光
蒼髯冉冉猶含怒
辯口瘖瘖尚帶霜
若使先生居戰國
不知何道處齊梁

送陳惟定惟定有伏闕上書之意因以箴之二

首

征衫結束賦歸歟
出得樊籠氣便舒
為福定知因失馬
浩歌元不歎無魚
江湖是處堪垂釣
虎豹當關莫上書
食肉宜憂我何預
問津恐復遇長沮

傾蓋相逢二紀前
六回相見兩華顛
詩成神鬼皆遭役

命薄文章不直錢
此事如斯君可去
西齋重到我淒然
他年卜築如相覓
更約西山暮雨邊

寄蕭彥毓

蕭郎門巷近何如
想見青青長碧梧
樓外青山無恙否
琴中流水有知無
他年歸橐惟詩卷
別後春風負酒爐
望斷碧雲無過鴈
夕陽孤鳥沒平蕪

張漕仲隆快目樓

天上張公百尺樓
眼高四海氣橫秋
祗愁笑語驚閭闔

不管欄干犯斗牛
遠水拍天迷釣艇
秋風萬里入貂裘
面前不著淮山礙
望到中原天盡頭

寄韓平叔二首

相從車轍半江西
同歷悲歡共險夷
孺子亭前春繫馬
庾公樓下夜聞雞
放懷呼酒長歌日
促膝挑燈細語時
暗憶淒涼多少事
此情不語有誰知

淡煙秋水白漫漫
夜別江亭劍氣寒
千里思君愁月色
有時無語倚欄干
倡酬詩卷應無恙
耐久交情過後看

他日歸舟無俗客撐篷容我話辛酸

臨川報恩寺與涂子載陳惟定分韻得丹字

杏花枝上雨初乾梵宇苔深碧瓦寒
三客燈前共湖海五言詩裏定金蘭
殘年短髮因愁白多病衰顏借酒丹
後夜相思月千里不堪獨自倚欄干

騮馬行

憶昔初見騮馬歸主人愛馬過愛兒
丁寧圉人謹相視一夜十起芻秣之
長年煮料雜以豆按時飼馬欲馬肥

爬梳剔抉去疥痒裂鼻灌藥煩獸醫髀成十箇料花出
如以膏沐膏其皮青絲絡頭鞍轡好塗金作鞞光陸離
主人愛馬馬戀豆牽來顧主時驕嘶口才三齒力方壯
未老保生常乘騎淮南忽然有馬至骨骼比此尤雄奇
駟黃鐵脊豹其脚雲鬃霧鬣風披披刺頭嚙韉過若電
脫兔奔鹿何由追主人意却在新馬衆口共譽無一違
停燈在廢潔水草恰似騮馬初來時騮馬在傍意慘淡
雖未見斥頭已垂嗚呼騮馬勿用悲自古世事皆如斯

幽王昔日娶申后既得褒姒后寵衰楚王宮中棄前魚
紅袖嗚咽流涕浹人心改變在頃刻嗚呼騶馬勿用悲
嗚呼騶馬勿用悲淮南無日無馬來

音齒

寄朱濟仲

家在三千里人來天盡頭角聲連夜月草色帶邊秋妻
子仍多病音書缺寄郵歸心與寒鴈先已過瓜洲

江湖小集卷四十九